



FONO AOAO FAITULAFONO A SAMOA

LIPOTI A LE KOMITI O TUPE MAUA MA

TUPE TOTOGI

I LE

P.P.2014/2015 Nu.151,

LIPOTI FAALETAUSAGA A LE

KAMUPANI VAALELE A LE POLENISIA MO LE

TAUSAGA FAALETUPE FAAIUINA

ASO 30 IUNI 2014.

(Tuuina atu i le Fono Aoaofaitulafono)

1. FAUTUAGA

Ua fautuaina e le Komiti o Tupe Maua ma Tupe Totogi le Fono Aoao ina ia faautagia lana Lipoti.

2 IUGAFONO.

Ina ia faamaonia le P.P.2014/2015 Nu.151, Lipoti Faaletausaga a le Kamupani Vaalele a le Polenisia mo le Tausaga Faaletupe faaiiuna aso 30 Iuni 2014.

3 FAUTUAGA.

I le faia i luga o ana Sailiiliga, e fautuaina ai e le Komiti le Malo:

1. **Ia faatinoina loa e le Pulega ma le Komiti Faafaoe a le Kamupani Vaalele o le Polenisia se tasi o a latou fuafuaga alualu mamao (negotiations & planning), mo le faafaoeina o femalagaina Faava o Malo, aemaise lava i le va o Niu Sila, Ausetalia ma Amerika. E faavae le finagalo a le Komiti i mafuaaga nei:-**
 - **Pe ua lē alagatatau i le taimi nei ona toe silasila le Kamupani o le Polenisia i le toe faatauina/lisi mai o se tatou vaalele mo femalagaina Faava o Malo;**
 - **Ua matauina le galulue faa-paaga ai o le Kamupani Vaalele a Niu Sila le Air New Zealand, ma le Kamupani Vaalele a Ausetalia le Virgin Australia lea o lo o faafaoeina le Virgin Samoa, ma e avea lea ma mafuaaga e ono taugata ai pasese mo le atunuu ma tagata tafafao maimoa mai fafo.**
2. **I le faatinoina ai o le Fautuaga ua taua i luga, e matuā fautuaina ai e le Komiti le faafaoeina o se sailiiliga mae'ae'a (Feasibility study) ina ia aua nei toe tulai mai tulaga ogaoga sa tulai mai i taimi ua tuanai.**

3. Ia silasila le Pulega mo le fetuunai ai o faigamalaga o vaalele i le va o Faleolo, Fagalii, Maota ma Asau. E manatu le Komiti e ao lava ona faatino lea auaunaga ma le fuafua lelei ina ia maua ai pea tupe mamā.
4. Ia ave le faamuamua a le Kamupani i ana galuega faatino o lo o maua ai ana tupe maua e aofia ai auaunaga i le fogaeleele (ground handling) i Faleolo. E faatauaina tele e le Komiti lenei auaunaga ona o vaega nei:-
- i) Ia maua ai pea avanoa faigaluega mo tatou tagata e faatinoina le auaunaga i le fogaeleele i Faleolo;
 - ii) ua i ai nisi kamupani mai fafo ua faatinoina lea auaunaga, ae o le naunautaga a le Komiti, ia toe faafoi mai le faatinoina o nei galuega i le Kamupani Vaalele a le Polenisia.
- E manatu le Komiti, o le lelei faatino o nei galuega i le fogaeleele e se kamupani e tasi, o le faatumauina foi lena o le lelei, aemaise ai o le saogalemu o femalagaina e lē gata i taimi e tu laueleele ai vaalele tetele i Faleolo, ae faapea foi mo le toe tapenaina o ia vaalele mo le malaga ese atu.

4. FAATOMUAGA

O le Komiti o Tupe Maua ma Tupe Totogi a le Malo ua faavaeina i lalo o aiaiga o le Tulafono Tumau 170 ma e aofia ai:-

<u>Sui Usufono</u>		<u>Filifilia</u>
Susuga Hon PAPALIITELE Niko Lee Hang	Taitaifono	31/05/2011
Afioga TAFUA Maluelue Tafua	Sui Taitaifono	31/05/2011
Afioga Hon PALUSALUE Faapo II	Sui Usufono	31/05/2011
Afioga TAEFU Lemi Taefu	Sui Usufono	31/05/2011
Afioga AFUALO Dr Wood Uti Salele	Sui Usufono	31/05/2011
Afioga TIALAVEA F Tionisio Seigafolava	Sui Usufono	31/05/2011
Tofa LEALAILEPULE Rimoni Aiafi	Sui Usufono	31/05/2011
Afioga Hon FAUMUINA T Faaolatane Liuga	Sui Usufono	20/08/2014

5. TULAFONO TUMAU 170:

E tusa ai ma aiaiga o le Tulafono Tumau 170, o le a avea ma tiute o le Komiti o Tupe Maua ma Tupe Totogi :-

- (a) Iloiloina o so o se Tulafono Tu Faaofi, Talosaga po o nisi mataupu e tuuina atu i ai e le Fono Aoao e tusa ai o nei Tulafono Tumau ma ia Tala Faatatau o Tupe po o le toe iloiloga o le faatinoga o galuega a Matagaluega;
- (b) Faasoa atu i so o se Komiti Filifilia na te faatinoina suesuega o so o se Tala Faatatau o Tupe ma so o se iloiloga o le faatinoga o galuega a Matagaluega, ma ia manaomia lea Komiti Filifila ina ia toe lipoti atu a o le i tuuina atu le Lipoti a le Komiti o Tupe Maua ma Tupe Totogi i le Fono Aoao;
- (c) Le suesueina o Faiga Faavae, Faafoga ma tupe alu a Matagaluega ma Faalapotopotoga a le Malo e faasino i tupe a le Malo, Inisiua, supaanueta, Faaputugatupe mo le Lumanai Manuia, Lafoga, sueina faasuetusi o faamatalaga o tupe a le Malo ma Faamatalaga tau tupe a Matagaluega;
- (d) Iloiloga aoao o faafoga tau pulega o tupe i Matagaluega uma ma Matagaluega a le Malo;
- (e) Suesueina ma lipoti atu i faamatalaga o tupe a le Malo.

6. PEPA SA ILOILOINA :

P.P 2014/2015 Nu. 151, Lipoti Faaletausaga a le Kamupani Vaalele a le Polenisia mo le tausaga faaiuina aso 30 Iuni 2014;

7. OTOOTOGA O SAILIILIGA:

I le aotelega o Sailiiliga a le Komiti ua matauina ai, o le Lipoti Faaletausaga a le Kamupani Vaalele a le Polenisia mo le Tausaga Faaletupe e faaiuina aso 30 Iuni 2014, o lo o auiliili mai ai Faamatalaga Tau Tupe ma Galuega Faatino na mafai ona ausia e le Kamupani Vaalele i lea vaitaimi. O Galuega Autu po o tiute tauave a le Kamupani Vaalele a le Polenisia e aofia ai :-

- *Tautuaina lea o tagata femalaga'i ma uta i le va o Samoa e lua;*
- *Le tagofia lea o galuega tau faigamalaga a vaalele i luga o le fogaelele i le Malae Vaalele Faava-o-Malo i Faleolo;*
- *Galuega Faaofisa malaga autu mo isi Kamupani Vaalele i Fagalii.¹*

Ua matauina e le Komiti, o le sefulu (10) ai lenei o tausaga talu ona osia le feagaiga a le Kamupani Vaalele a le Polenisia ma le Kamupani Vaalele a Ausetalia le Virgin Samoa. O lenei faiga paaga sa faavaeina i le tasuaga 2005 sa faaoga ai vaalele tetele mo femagalaina faava o Malo i Niu Sila ma Ausetalia.

Ua matauina e le Komiti i le Lipoti Faaletausaga nei le sologa manuia ma le siitia ai o tupe maua a le Kamupani o le Polenisia. I le molimau a le Pulega a le Kamupani, o se fiafiaga tele i le Kamupani ona ua mafai ona ausia lana polofiti i tupe faasili e **\$2,432,484²**, ina ua maea lafoaga e pei ona faamauina i le Lipoti Faaletausaga mo le Tausaga Faaletupe leni 2013/2014.

7.1. FAAMATALAGA TAU TUPE³

POLYNESIAN LIMITED

LIPOTI FAA-LE-TAUSAGA 2014

FAAMATALAGA O GALUEGA TAU TUPE

MO LE TAUSAGA FAAIUIINA 30 IUNI 2014

	<i>Faamatalaga</i>	30-Iuni-2014 WST	30-Iuni-2013 WST
TUPE MAUA			
Tupe maua mai Galuega autu:			
- Galuega Tau Vaalele	1(a)	11,615,481	10,083,369
- Tagofia o Vaalele i luga o le Fogaelele	1(a)	2,330,372	2,454,001
- Galuega Tau Ofisa Malaga Autu	1(a)	1,021,151	1,314,639
Isi tupe maua		8,078	34,481
AOFAIGA ATOA O TUPE MAUA		14,975,082	13,886,490
toese			
TUPE FAAALU			
Mo Galuega Faatosina ma le Makelina	2(a)-2(f)	1,667,903	1,518,509
Mo Galuega Inisinia ma Oloa Faafau Mai	2(a)-2(f)	4,385,594	4,057,759
Mo Galuega tau Vaalele	2(a)-2(f)	3,323,427	3,123,207
Mo le Tagofia o Vaalele i le Fogaelele	2(a)-2(f)	2,441,914	1,942,011
Mo Galuega tau Ofisa Tutotonu ma le Pulega	2(a)-2(f)	867,835	951,209
Mo le Faaititia o le Tau o Mea Totino Faavaitaimi Umi	12	944,669	1,024,863
AOFAIGA ATOA O TUPE FAAALU MO GALUEGA MASANI		13,631,342	12,617,558
Tupe faasili(pau) mai tupe mo le faatupeina o galuega	3	479,514	(72,595)
TUPE FAASILI MAI I GALUEGA MASANI AE LEI FAALAFOGAINA		1,823,254	1,196,337
Tupe Alu i Lafoga o Tupe Maua	1(b), 4	-	(631)
TUPE FAASILI INA UA UMA ONA TOTOGI LAFOGA		1,823,254	1,195,706
<i>Tupe maua i le sea e tasi</i>	18	0.35	0.24

O faamatalaga e talafeagai ai o loo i le itulau 12 e oo atu i le 21 e avea ma vaega o nei faamatalaga o galuega tau tupe.

Itulau 8

¹ Galuega Autu – Itulau 1.

² Lipoti a le Pule Sili – Itulau 3.

³ Faamatalaga Tau Tupe 2013/2014 – Itulau 8.

Sa faamauina le agaga faafetaia a le Komiti i le Pulega ona e lē gata i le ausia ai o tupe faasili mo le Kamupani mo le tausaga faaletupe leni, ae faapea foi i le vave tapenaina ma le tuuina mai o le Lipoti Faaletausaga i le Palemene e atagia ai le lelei faafoe o galuega faatino ma le vaaia lelei o tulaga tau tupe a le Kamupani. Sa faamauina foi le agaga faafetai a le Taitaifono ma le Komiti i le Susuga i le Pule Sili talu ai le Tofa Tauā Fatu Tielu mo le tauaveina ma le faafoeina o pulega a le Kamupani i le vaitaimi e pei ona lipoti mai.

7.2. FEAGAIGA OSI MA LE KAMUPANI AUSETALIA.

O lo o faamauina i le Lipoti Faaletausaga, o le isi vaega tele na mafai ai ona ausia tupe faasili e le Kamupani, ona o le osiga-feagaiga a le Malo o Samoa ma le Kamupani Vaalele o le Virgin Blue a Ausetalia. O leni feagaiga sa faaveina i le tausaga e 2005.

Na taua e le Pulega, o le Kamupani Vaalele a le Polenisia, talu mai le tausaga faaletupe 2007/2008, ua siitia nei faigamalaga Faava-o-Malo i vaiaso taitasi ma o se itu ua faafiafiaina ai le kamupani e lē gata ua maua ai le avanoa mo femalagaiga a le atunuu lautele mai Samoa nei i atunu i fafo, ae faapea foi i le faimalaga mai o aiga o lo o aumau i Niu Sila ma Ausetalia i Samoa nei.

Sa fesiligia e le Komiti le Pulega i se faatatau e toe iloiloaina ai le feagaiga leni, ona ua matauina ua fai-paaga nei le Kamupani o le Virgin a Ausetalia ma le Kamupani Vaalele a le Air New Zealand. O leni faiga paaga ua tulai mai ai se faafitauli tele ona ua taofia ai le faiga faatauvaga a ia kamupani, a ua faatulaga lava e nei kamupani vaalele totogi po o pasese o tagata femalagai i le va o Niu Sila ma Ausetalia e laugatasia ai nei kamupani. O lona uiga, ua leai se isi alofaga e tua iai lo tatou atunuu femalaga'i, ona ua na o le pau nei o vaalele o lo o feoai i le va o Niu Sila ma Ausetalia ma e pule lava nei kamupani i le tau o a latou pasese. Ona o leni itu, e manatu ai le Komiti ina ia fautuaina le Komiti Faafoe ma le Pulega ina ia toe silasila i se auala e mafai ai ona toe faatino faigamalaga tau vaalele a le tatou Malo e pei ona sa iai muamua.

7.3. FUAFUAGA ALUALU MAMAO A LE KAMUPANI.

I sailiiliga a le Komiti na matauina ai, ua faamaonia nei e le Komiti Faafoe i luga o le Fautuaga a le Pulega le toe faagaioi ai o se tatou vaalele tele la'upasese e pei ona iai muamua. Na taua e le Pulega ua maea faatino nisi o faatalatalanoaga ma kamupani vaalele i fafo ma ua tagai nei le Pulega i le toe faatauina mai faalisi o se tatou vaalele.

Sa iloga ona lauliliuina e le Komiti lenei fuafuaga ona sa manatu le Komiti i le lelei faafoe o galuega faatino i le taimi nei ma le auunaga o femalagaina a tatou vaalele laiti o lo o tautuaina le atunuu femalagai i le va o Tutuila ma Manua. Peitai sa faamamafa e nisi o finagalo o le Komiti le tulaga pagatia sa taunuu iai le faatinoina o auunaga tau femalagaina o valele tetele i futia ua sola, ma o le tulaga lea sa taliagata ai e nisi o le Komiti lenei faamoemoe. Peitai, sa taua e le Pulega ua maea ona soalaupuleina vaega uma sa tulai mai ai le faafitauli i le Kamupani ma ua faamaonia foi e le Pulega o le a nofo uta iai ina ia mautinoa e le toe tulai mai nei faafitauli pe a taunuu ona faatino lenei faamoemoe. Na taua e le Pulega e tusa ai ma ana fuafuaga alualu mamao, ua iai le naunautaiga ina ia faatinoina femagalina a le tatou vaalele i le masina o Novema o le tausaga nei 2015.

Ua matauina e le Komiti, i le Lipoti Faaletausaga a le Kamupani Vaalele o le Polenisia mo le tausaga faaletupe 2014, sa faagai ai ana auunaga e ala i ni itutino e lua e aofia ai :-

1. **Kamupani o le Polenisia - (*Polynesian Limited*);**
2. **Kamupani o le Polenisia - Tupe Teu Faafaigaluega (*Polynesian Airlines Investment*)**

7.4. Kamupani o le Polenisia—(Polynesian Investment)

Ua matauina e le Komiti i le Lipoti Faaletausaga lenei le sologa manuia ma le siitia ai o tupe maua a le Kamupani o le Polenisia. I le molimau a le Pulega a le Kamupani, o se fiafiaga tele i le Pulega ona ua mafai e le Kamupani ona ausia tupe faasili e tusa lea ma le **ST\$609,230⁴** mo le Tausaga Faaletupe e pei ona lipotia mai. Na taua e le Pulega, o le isi vaega tele na mafai ai ona ausia e le kamupani ana tupe faasili, o le toe tatalaina lea o le malae vaalele i Fagalii mo femalagaina i le va ma Tutuila ma Manua. Na taua e le Pulega, talu mai ona maea galuega mo le toe faaleleia o le malae vaalele i Fagalii-uta, ua avea nei ma galuega autu a le kamupani le puleaina ma le faafaigaluegaina o aseta ma meatotino e faatino ai ana galuega tau vaalele.

O le Kamupani o le Polenisia po o le Polynesian Limited o lo o gafa ma le faafoeina o femalagaiga o le atunuu lautele atoa ai ma felauaiga o uta i totonu o le pasefika e aofia ai ma Amerika Samoa. Ua matauina e le Komiti, o le isi galuega patino a le vaega lenei o le mata'ituina ma le tagofia lea o galuega tau vaalele i luga o le fogaelele (Ground Handling Operations) i le Malae Vaalele Faa-va o Malo i Faleolo. Na taua e le Pulega o le Kamupani Vaalele a le Polenisia, o le isi lenei o auunaga a le Kamupani o lo o maua mai ai le tele o ana tupe maua. Peitai e tusa ai ma le molimau a le Pulega, o se tasi vaega

⁴ Lipoti a le Faatonu – Itulau 6 (*Polenisia Investment*)

ua lē o toe faamanuiaina ai le Kamupani a le Polenisia e ala i ana tupe maua faaopoopo, ona o lo o fa'auau pea i le taimi nei le faatinoina e se Kamupani Ausetalia o auunaga tau vaalele i le fogaeleele i Faleolo mo vaalele uma a le Polynesianblue. Na amatalia leni suiga i auunaga ma galuega faatino a le kamupani leni talu mai Ianuari o le tausaga 2011.

Na fesiligia e le Komiti le mafuaaga na faavae ai leni Faaiuga ua ala ai ona faamatuu ese atu lea auunaga sa faatinoina e le Kamupani. Peitai na taua e le Pulega, o le itu sa silasila iai le Kamupani Vaalele a le Virgin Australia sa faailoa atu i le Komiti Faatino o le Kamupani Vaalele a le Polenisia, o tulaga tau i le saogalemu. Peitai na faailoa mai e le Pulega a le Polenisia, atonu o le faasaoina ai o tupe faaalu a le kamupani vaalele o le Virgin Blue ua ala ai ona faamatuu atu i le kamupani o le Oceania mai Ausetalia le faatinoga o galuega i luga o le fogaeleele(ground handling operations). Na taua foi e le Pulega a le Polenisia, o lo o faatinoina foi e le kamupani leni auunaga i le fogaeleele i isi atunuu o lo o afea e vaalele a le kamupani o le Virgin Blue.

Na fesiligia e le Komiti tulaga tau auunaga a le kamupani o le Polenisia i Faleolo, pe lē o le mafuaaga tonu lea ua mafua ai ona faatinoina leni suiga, peitai, na taua e le Pulega, e lē faamaonia lea mau, ma o lo o lelei le faatinoga o le auunaga a le kamupani i Faleolo. Na taua e le Pulega, o le faamaoniga o lea tulaga ona o lo o faaogaina pea i le taimi nei e le Kamupani Vaalele a le Malo a Niu Sila (Air New Zealand) ma le Kamupani Vaalele a le Malo o Fiti (Fiji Airways), le tautua ma le auunaga i luga o le fogaeleele o lo o ofoina atu e le Kamupani a le Polenisia i Faleolo.

E manatu le Komiti sa telē le avanoa e ono mafai ai ona foia nei fe'eseesea'iga ma saili nisi auala e faalelei atili ai le auunaga i lea vaitaimi, ae ona o le lē soalaupuleina lava o ia vaega ua ala ai ona faatino nisi o faaiuga fai. E manatu le Komiti e ao ona toe silasila tooto'a i ai le Malo ma le Komiti Faatino a le Polenisia i leni mataupu, mo le toe faia lea o ni feutagaina ma le Kamupani o le Virgin Blue aemaise ai ua tulata foi le vaitaimi e maea ai le faiga paaga leni ona toe fetuunai lea o se isi faiga mo le lumanai.

7.5. Kamupani o le Polenisia (Tupe Teu Faafaigaluega) –Polynesian Airlines (Investments)

O le Kamupani Vaalele o le Polenisia Tupe Teu Faafaigaluega (Investments), o se kamupani Tumaoti sa faatuina faaletulafono i lalo o le Tulafono o Kamupani 2001. O le sini autu i le faavaeina o leni kamupani sa faamoemoe lea mo Tupe Teu Faafaigaluega mo le Kamupani Vaalele. Na taua e le Pulega o le Kamupani Polenisia Tupe Teu Faafaigaluega, sa lisiina atu ana meatotino i isi ona itutino e i ai le Polenisia Umia (Holdings) ma le Kamupani Vaalele o le Polenisia.

TULAGA TAU TUPE A LE KAMUPANI POLENISIA (INVESTMENT).

POLYNESIAN AIRLINES (INVESTMENTS) LIMITED

LIPOTI FAA-LE-TAUSAGA 2014

**FAAMATALAGA O GALUEGA TAU TUPE
MO LE TAUSAGA FAAIUINA 30 IUNI 2014**

	<i>Faamatalaga</i>	30-Iuni-14 WST	30-Iuni-13 WST
TUPE MAUA			
Tupe maua mo le faaogaina o le Malae Vaalele	1(a)	1,508,719	1,085,685
Tupe maua mo le Iisiina o Ofisa Avanoa o le Malae Vaalele	1(a)	135,240	55,240
Tupe maua mo le tulauveelele o vaalele	1(a)	308,935	21,681
Isi tupe maua	1(a)	6,100	3,520
AOFAIGA ATOA O TUPE MAUA		<u>1,958,994</u>	<u>1,166,126</u>
TUPE FAAALU			
Mo le Sueina o Tusi		9,757	9,060
Faaititia o le tau o Mea Totino Faavaletami Umi	1(c), 3	69,395	61,507
Alauni mo Faatonu	5	12,460	12,286
Tului o le tupe aitalafu mai le Polynesian Limited	1	501,787	-
Lipea ma le Faalelela	1(d)	85,594	94,767
Pulpuiga ma Pulega Vaalele Sivili		31,062	49,309
Aufalgaluega	1(e)	433,809	428,961
Mo isi tupe alu		205,901	130,710
AOFAI ATOA O TUPE ALU		<u>1,349,764</u>	<u>786,600</u>
TUPE FAASILIA AE LEI TOESE LAFOGA O TUPE MAUA		609,230	379,526
Lafoga o Tupe Maua	8	-	-
TUPE FAASILIA INA UA UMA ONA TOESE LAFOGA O TUPE MAUA		609,230	379,526
Tufatufaga na faia poo fuafua e fai		-	(18,976)
Tupe pau faaputupu mai i tausaga ua mavae		<u>(4,952,664)</u>	<u>(5,313,214)</u>
TUPE PAU FAAPUTUPUTU E TAUAVE MO LE LUMANAI		<u>(4,343,434)</u>	<u>(4,952,664)</u>

O faamatalaga e talafeagai ai o loo i le itulau 9 e oo i le 12 e avea ma vaega o nei faamatalaga o galuega tau tupe.

Ua matauina e le Komiti o lo o faaauau pea i le taimi nei femalagaina a le Kamupani a le Polenisia ma kamupani vaalele a le Malo o Tutuila ma Manu'a mo le tautuaina o le mamalu o le atunuu e lē gata mo faigamalaga mai Samoa nei e faimalaga atu i Tutuila, ae faapea foi mo tagatanuu o Tutuila e faimalaga mai mo tafaoga ma faalavelave tau le aiga i Samoa nei. O se itu lelei lenei ua siitia ai tupe maua a le Polenisia ona e lē gata ua tuuitiitia nei tauvaga ma kamupani vaalele a Tutuila ona ua faamutaina auaunaga a le kamupani a le South Pacific Express i le taimi nei.

8. FAUTUAGA.

I le faia i luga o ana Sailiiliga, e fautuaina ai e le Komiti le Malo:

1. **Ia faatinoina loa e le Pulega ma le Komiti Faafoe a le Kamupani Vaalele o le Polenisia se tasi o a latou fuafuaga alualu mamao (negotiations & planning), mo le faafoeina o femalagaina Faava o Malo, aemaise lava i le va o Niu Sila, Ausetalia ma Amerika. E faavae le finagalo a le Komiti i mafuaaga nei:-**
 - i) **Pe ua lē alagatatau i le taimi nei ona toe silasila le Kamupani o le Polenisia i le toe faatauina/lisi mai o se tatou vaalele mo femalagaina Faava o Malo;**
 - ii) **Ua matauina le galulue faa-paaga ai o le Kamupani Vaalele a Niu Sila le Air New Zealand, ma le Kamupani Vaalele a Ausetalia le Virgin Australia lea o lo o faafoeina le Virgin Samoa, ma e avea lea ma mafuaaga e ono taugata ai pasese mo le atunuu ma tagata tafafao maimoa mai fafo.**
2. **I le faatinoina ai o le Fautuaga ua taua i luga, e matuā fautuaina ai e le Komiti le faafoeina o se sailiiliga mae'ae'a (Feasibility study) ina ia aua nei toe tulai mai tulaga ogaoga sa tulai mai i taimi ua tuanai.**
3. **Ia silasila le Pulega mo le fetuunai ai o faigamalaga o vaalele i le va o Faleolo, Fagalii, Maota ma Asau. E manatu le Komiti e ao lava ona faatino lea auaunaga ma le fuafua tatau i le fai fuafua i tagata faimalaga mai lea taimi i lea taimi, ina ia mautinoa le maua ai pea o tupe mamā a le Kamupani.**

4. Ia ave le faamuamua a le Kamupani i ana galuega faatino o lo o maua ai ana tupe maua e aofia ai auaunaga i le fogaeleele (ground handling) i Faleolo. E faatauaina tele e le Komiti leni auaunaga ona o vaega nei:-

i) Ia maua ai pea avanoa faigaluega mo tatou tagata e faatinoina le auaunaga i le fogaeleele i Faleolo;

ii) ua i ai nisi kamupani mai fafo ua faatinoina lea auaunaga, ae o le naunautaiga a le Komiti, ia toe faafoi mai le faatinoina o nei galuega i le Kamupani Vaalele a le Polenisia.

E manatu le Komiti, o le lelei faatino o nei galuega i le fogaeleele e se kamupani e tasi, o le faatumauina foi lena o le lelei, aemaise ai o le saogalemu o femalagaina e lē gata i taimi e tu laueleele ai vaalele tetele i Faleolo, ae faapea foi mo le toe tapenaina o ia vaalele mo le malaga ese atu.

9. IUGAFONO.

I le maea o ana iloiloga, na faaiugafonoina ai e le Komiti e fautuaina le Fono Aoao :-

Ina ia faamaonia le P.P 2014/2015 Nu.151, - Lipoti Faaletausaga a le Kamupani Vaalele a le Polenisia mo le Tausaga Faaletupe sa faaiuina i le aso 30 Iuni 2014.

Pepa Faapipii.1.**1. MOLIMAU**

A o faagasolo ana iloiloga i le Lipoti Faaletausaga, sa fofogaina e le Komiti ni faamatalaga molimau sa tuuina mai e le Pulega o le Kamupani Vaalele a le Polenisia.

Kamupani Vaalele a le Polenisia.

Seiuli Alvin W Tuala

-

Pule Sili.

Daisy H Roebeck

-

Pule – Vaega o Tupe.

Pepa Faapipii 2.

Hon PAPALIITELE Niko Lee Hang.
Taitaifono

TAFUA Maluelue Tafua
Sui Taitaifono.

Hon PALUSALUE Faapo II
Sui Usufono

Hon FAUMUINA Tiatia F Liuga
Sui Usufono

LEALAILEPULE Rimoni Aiafi
Sui Usufono

AFUALO Dr Wood Uti Salele
Sui Usufono

TIALAVEA F T Seigafolava
Sui Usufono

TAEFU Lemi Taefu
Sui Usufono